

մանապէս և ազգականներն, երբէք ներկայ չեն լինում թէ եկեղեցում պատկազրութեանը և թէ ընդհանրապէս հարստանիքում, փեսայի տանը, այլ հարսը տանելուց յետոյ մնում են իրենց տանը: Նոյն թշնամական հետքերը աւելի բելիէֆ երևում են Բուլանըխի մի սովորութիւնից: «Պսակուելուց 4—5 շաբաթ յետոյ սովորութիւն ունեն հարսի հէրանք՝ վերագարձնել աղջիկը իրենց տուն, որ կրկատարուի յատուկ հրաւիրակ կնոջ ձեռամբ: Մնալով 3—4 շաբաթ հէրանց տանը, վերագարձը նոյնպէս և փեսայի տան կողմից գնացող հրաւիրակ կնոջ ձեռքով կրկատարուի»¹⁾: Այդ ժամանակից յետոյ հարսը իրաւունք ունի յաճախել իւր պապունց տունը: Այս տեսակ կեղծ խզուած յարաբերութիւնները երկու ընտանիքների մէջ և հարստանիքից յետոյ, ի հարկէ, պէտք է բացատրել այն թշնամական զգացմունքով, որը առաջանում էր հին ժամանակները աղջիկը փախցնելիս վերջինիս ծնողների մէջ: Անհրաժեշտ էր հաշտութիւն կայացնել, որպէսզի աղջիկը կարողանար իւր ծնողների մօտ յաճախել:

Մի նոյնաման սովորութիւն գոյութիւն ունի նաև Դարալագեագում, ուր մեծ պասի միջինքին (երբ հարստանիքը բարեկենդանին է կատարուած) հարսի հայրը իւր աղջկայ համար բերում է թաւրալ, այսինքն զանազան մրգեղէն և ուտելիք: Ծաղկագարդին իւր աղջկան հրաւիրում է իւր տուն և այդ հրաւերը կոչւում է դարձ. աղջկան ծնողները պահում են իրենց մօտ մինչև համբարձում²⁾:

V.

Վերը բերած բոլոր օրինակները, մեր կարծիքով, միանգամայն բաւական են պարզաբանելու այն հարցը, թէ հա-

1) Բենսէ՝ Բուլանըխ—Ազգագր. Հանդէս, 1899 թ. գիրք Ե.

2) Քաջբերունի՝ Հայկական սովորութիւններ—Ազգագրական Հանդէս, 1901 թ. գիրք. VII և VIII. ևր. 201.